

ՍԱՐԿԱՎԱԳԱԿԱՆ ՁԵՌՆԱԴՐՈՒԹՅՈՒՆ ՍԵՎԱՆԻ ՎԱՋԳԵՆՅԱՆ ԴՊՐԱՆՈՑՈՒՄ

Մայիսի 16-ին, Հիսուս Փրկչի Համբարձման տոնի առիթով, Սևանի Սբ. Առաքելոց վանքում, հընթացս սուրբ և անմահ պատարագի, ձեռամբ Արարատյան թեմի Առաջնորդական Փոխանորդ Տ. Գարեգին արքեպիսկոպոս Ներսիսյանի, Սևանի Վազգենյան դպրանոցի սաներ Տիգրան Գափոյանը, Արարատ Չոփուրյանը, Արմեն Խաչատրյանը, Ադամ Տոնիկյանը, Հարություն Սարիբեկյանը, Հրանտ Պետրոսյանը, Արթուր Հայրապետյանը, Արտակ Արթենյանը, Հրաչյա Խաչատրյանը սարկավագական ձեռնադրության արժանացան:

Քարոզիտուքի ընթացքում Գարեգին Արքագանը փառք տվեց Աստծուն, որ իր Ամենակալ Աջը մնայուն կերպով հովանի դարձրեց Հոգևոր Դպրանոցի վրա և տարիներ առաջ փայփայած իր երազն այսօր իրականություն դարձրեց: Արքագանն ավելացրեց նաև, որ հոգևոր այս հաստատությունն հիմնելիս ինքը մեկ նպատակ է ունեցել՝ կերտել հոգևորականաց մի սերունդ, որը մեր ժամանակների ոգուն հարազատ, ունենա առավել քարծր աստվածաբանական գիտելիքներ և մեր հայրերի սուրբ ժառանգությունը յուրացրած՝ հասու լինի մեր պատմության խորհրդին, Եկեղեցու առաքելությանն ու ընդհանրական սուրբ եկեղեցու հայրերի ոգուն: Իր խոսքում ի մասնավորի Արքագան Հայրն ասաց.

- Այսօր այս սուրբ խորանի առջև Հոգևոր դպրանոցի ինը սաներ ծնրադրեցին և մեր ձեռնադրությամբ ստացան սարկավագության աստիճան: Վեց տարիներ առաջ էր, երբ այցելեցինք Սևանի այս կղզին և կանգնելով Խրիմյան Հայրիկի կողմից հաստատված ընծայարանի շենքի առաջ, մտահղացանք, գեղատեսիլ այս վայրում հիմնել կրթական մի հաստատությունը, որը կուփի և մեր Եկեղեցուն ու ժողովրդին արժանավոր հոգևոր սերունդ հասցնի: Դժվարին եղան այս վեց տարիները ոչ միայն դասախոսական ու տեսչական կազմի, այլ նաև սանուց համար, սակայն կենցաղային դժվարին այդ պայմանները որքան որ նպաստող չէին կրթական կյանքի կազմակերպմանը, այդուհանդերձ առավելապես զգտակար էին սանուց նկարագրի, կամքի, ոգու կերտման և ձևավորման համար: Այսօր ես երջանիկ եմ, և ուրախ է իմ հոգին, որ հոգևոր այս հաստատությունը նորովի զգեստավորում է ստանում: Սի քանի ժամ ևս և սքեմավորները պիտի շատանան այս թերակղզու վրա, պիտի քայլեն դեպի այս եկեղեցին աղոթելու և իրենց ուխտը Աստծո առջև, մեր ժողովրդի առջև կատարելու: Ուխտ ծառայության, ուխտ նվիրումի, ուխտ զոհաբերության և անմնացորդ ու հաստատուն հավատքի:

Սարկավագությունը ծառայության մի աստիճան է, սպասավորության մի պաշտոն: Եվ ես հավատում եմ, որ այն աղոթքները, որ ընթերցեցինք այստեղ, իրապես Սուրբ Հոգու շնորհներով պիտի լեցնեն ձեզ, պիտի զարոտառին ձեզ, պիտի գեղեցկացնեն ձեր միտքն ու հոգին, ձեր սիրտը և ինչու չէ՝ նաև արտաքինը:

Մեր հիմնական նպատակը, երազն ու ձգտումը այն է, որպեսզի այս հաստատությունում մենք կարողանանք պատրաստել հավատալոր հոգևորա-

կանցներ, նվիրյալ հոգևորականներ: Եվ ես հավատում եմ, որ իրապես դուք պիտի կարողանաք արժանավոր մի սերունդ լինել, անմիջական շարունակողները լուսավոր այն գործի, որ սկսել են մեր հայրերը՝ վանականները այս Սևանի կղզում ապրած ու գործած: Եվ այդ առումով ես կուզեմ համբարձման այս տոնի առիթով բերել ձեզ պատգամը մեր Տիրոջ՝ Հիսուսի Քրիստոսի, թե սիրեք միմյանց: Սիրեք միմյանց, որովհետև այդ սիրով է պայմանավորված ձեր աստվածսիրությունը:

Վերջում Արքազան հայրը, շնորհավորելով նորընծա ձեռնադրյալ սարկավագներին, հույս հայտնեց, որ նրանք կլինեն տաճար Աստուծո և կգործեն ի փառս Աստուծո, ի բարօրություն մեր ժողովրդի:

ՔԱՅԱՆԱՅԱԿԱՆ ՁԵՆԱԴՐՈՒԹՅՈՒՆ ԱՐԱՐԱՏՅԱՆ ՀԱՅՐԱՊԵՏԱԿԱՆ ԹԵՄԻ Ս. ՍԱՐԳԻՍ ԵԿԵՂԵՑՈՒՄ

Մայիսի 19 ին Արարատյան Հայրապետական Թեմի Առաջնորդանիստ Աբ. Սարգիս Եկեղեցում, սբ. պատարզի ընթացքում, ձեռամբ Թեմի Առաջնորդական Փոխանորդ Տ. Գարեգին արքեպիսկոպոս Ներսիսյանի, քահանայական սրբազան ձեռնադրություն և օծում ստացավ Վարուժան սարկավագ Տերտերյանը: Մայիսի 18-ին, երեկոյան ժամերգությանը, տեղի ունեցավ «Յերեկոյէ կոչումն քահանայութեան» կարգը՝ խարտավիլակությամբ Տ. Բագրատ արքեպա Գասպարյանի, որը վկայեց նորընծայի հոգեկան ու մտավոր պատրաստվածության ու արժանիքների մասին: Ապա նորընծան խոստացավ «յանձն առնուլ և կատարել զամենայն հրամանս սրբոց առաքելոցն և հայրապետացն և կալ ըստ կանոնաց նոցա», «ամենայն պատրաստութեամբ և առանց ձանձրանալոյ կալ ի պաշտօնն Աստուծոյ» և պահել «զգաւամութիւն ուղղափառ հաւատոյ, ընդ սուրբ Հայրապետն ըստ երից սուրբ ժողովոց»:

Կոչման արարողության ավարտին Վարուժան սարկավագը հրապարակորեն արտասանեց Հայաստանյայց Առաքելական Եկեղեցու «Հաւատոյ խոստովանութիւն»-ը ըստ Գրիգոր Տաթևացու սահմանած բանաձևի:

Հաջորդ օրը, հընթացս Աբ. Պատարագի, տեղի ունեցավ նորընծայի ձեռնադրությունը: Պատարագիչ Արքազան Հայրը սրբալույս մյուռոնով օծեց նորընծայի ճակատն ու ձեռքերը՝ վերանվանելով նրան Տ. Վարուժան քահանա Տերտերյան: Այնուհետև Տ. Գարեգին Արքեպիսկոպոս Ներսիսյանը նորընծային տվեց «զսկիի և զմաղզմայն»՝ ի նշան պատարագ մատուցելու իշխանության: Նորընծա քահանան, դառնալով ժողովրդին, տվեց իր առաջին օրհնությունը՝ «խաղաղութիւն ամենեցուն»:

Ապա Գարեգին Արքազանը շնորհավորական ու խրախուսական քարոզով դիմեց նորընծա քահանային՝ մաղթելով նրան հավատքի ուժ և կարողություն՝ գործելու ի փառս Աստուծո, ի պայծառություն Հայաստանյայց Սուրբ Եկեղեցվո: